

৬২.ভাই-চাচার বদলে মামা- আমরা এমন নির্লজ্জ কেন?

ড্রাইভার হেল্লারদেরকে এখন মামা বলা হয়। আগে ভাই/চাচা বলা হতো। এখন মামা বলা হচ্ছে। এ এক শয়তানি। মামার মধ্যে নারীর গন্ধ আছে। এ জন্য কৌশলে এর প্রচলন ঘটানো হয়েছে। ভাই/চাচার মধ্যে এমনটি নেই, তাই বাদ দেয়া হচ্ছে।

কুরআন হাদিসের ভাষায় মুমিনরা পরস্পর ভাই ভাই। আল্লাহ ও তার রাসূল আমাদের এমনটিই শিখিয়েছেন। কুরআন ও হাদিসে অসংখ্যবার এ ভাই ও ভ্রাতৃত্বের বিষয়টি এসেছে। যেমন, আল্লাহ তাআলা বলেন,

إِنَّمَا الْمُؤْمِنُونَ إِخْوَةٌ

“মুমিনগণ পরস্পরে ভাই ভাই।” -হুজরাত ১০

রাসূল সাল্লাল্লাহু আলাইহি ওয়াসাল্লাম ইরশাদ করেন,

“এক মুসলিম অপর মুসলিমের ভাই।” -সহীহ বুখারি ২৩১০,

সহীহ মুসলিম ৬৭৪৩

তাই সমবয়সী হলে ভাই বলে সম্বোধন করবে। বাবার বয়সী হলে চাচা বলে সম্বোধন করবে। এটা শুধু ইসলামেরই শিক্ষা নয়, জাহিলি যামানাতেও মানুষ এভাবেই সম্বোধন করতো। কিন্তু আজ নব্য জাহিলিয়াত সকল জাহিলিয়াতকে হার মানিয়েছে।

কুরআনে কারীমে মহিলাদের গৃহাভ্যন্তরে অবস্থানের নির্দেশ এসেছে। হাদিসে এসেছে, মহিলারা গোপন থাকার বস্তু, প্রকাশ হওয়ার বস্তু নয়। এজন্য একান্ত দরকার না পড়লে কুরআনে কারীমে মহিলাদের সম্বোধন করে কিছু বলা হয়নি, তাদের নামও নেয়া হয়নি। একান্ত যেখানে না নিলে হয় না সেখানেই কেবল মহিলাদের নাম নেয়া হয়েছে বা আলোচনা এসেছে। এমনই সতর্কতা শরীয়ত অবলম্বন করেছে। কিন্তু আমরা মুসলমানরা আজ আমাদের মা-বোনদের হাটে-ঘাটে

বিকিয়ে দিয়েছি। শেষ একটু হায়া-শরম যা ছিল তাও শেষ করে দেয়া হলো। এখন আর ভাই/চাচা নয়, মামা। কারণ, মামা হতে হয় মায়ের মধ্যস্থতায় আর ভাই/চাচা হতো বাপের মধ্যস্থতায়। এজন্যই ইসলামী শব্দ আর ইসলামী ত্বরিকাটা তুলে দেয়া হচ্ছে। আর আমরাও লুফে নিচ্ছি সাগ্রহে। কোথায় গেল আমাদের লজ্জা-শরম!